

KRIMINAL U tri odvojene akcije SIPA-e te GP BiH i Hrvatske

Zaplijenjeno više od 11 tona duhana!

U Grudama pronađeno 10 tona duhana u listu • U Orašju oduzeto više od tonu duhana, čija je vrijednost 23.000 KM • U graničnom pojasu nađena 103 kilograma duhana

U tri odvojene akcije koje su izveli pripadnici Državne agencije za istrage i zaštitu (SIPA) te službenici Granične policije (GP) BiH i Hrvatske oduzeto je više od 11 tona duhana, čija se vrijednost procjenjuje na više stotina hiljada maraka!

Kartonske kutije

Istražitelji SIPA-e, pod nadzorom Tužilaštva BiH, na području općine Grude pronašli su oko 10 tona duhana u listu. Kako su saopćili iz SIPA-e, na licu mjesta obavljen je uviđaj te su poduzete druge mjere i radnje. Duhan u listu nalazio se u 45 kartonskih kutija te 20 bala umotanih u PVC foliju.

Aktivnosti na terenu realizirane su u saradnji s pripadnicima Ministarstva unutrašnjih poslova Zapadnohercegovačkog kantona i službenicima Uprave za indirektno oporezivanje BiH.



SIPA duhan pronašla u kartonskim kutijama

Iz SIPA-e su naglasili da se rad na ovom predmetu intenzivno nastavlja, budući da nije otkriveno porijeklo duhana.

Pripadnici GPBiH, na osnovu naredbe Suda BiH, pretresli su objekt na području općine Orašje, koji je za ilegalnu proizvodnju duhana koristio 51-godišnji H. M.

Prilikom pretresa policajci su pronašli više od 1,1 tonu rezanog duhana te duhana u listu. Duhan je bio spakovan u velike kartonske kutije, poput kutija u kojima ga legalni proizvođači duhana, takozvani duhanari, predaju otkupnim stanicama.

Oduzet je duhan u listu, ali i rezani duhan u najlon kesama spreman za tržište. Osim navedenog, policajci su oduzeli i mašinu za rezanje duhana ručne izrade. Kako saznajemo, vrijednost duhana na ilegalnom tržištu viša je od 23.000 KM.

Mješovita patrola Jedinici


ce granične policije Gorica i Policijske postaje Imotski MUP-a RH spriječila je nezakonit promet 130 kilograma rezanog duhana, saopćeno je iz GPBiH.

Napušteno vozilo

Roba je otkrivena prilikom patrole u graničnom pojasu. U namjeri da zaustave i kontroliraju Renault hrvatskih registarskih oznaka, policajci su pratili vozilo te ga zatekli napuštenog na livadi, izvan makadamskog puta.

Obilaskom terena pronađene su odbačene četiri vreće rezanog duhana. Roba i vozilo bit će privremeno oduzeti. U toku je daljnji rad na ovom slučaju i pronalasku vozača.

Ta. T. - A. Ka.



U Orašju oduzeta i mašina za rezanje duhana

(Foto: T. Trogrlić)